

CAÇA CHE DIRUN SAN PEDRO MENAN

1 ¹U Pedro, apóstol yahn Dihvo vo Jesucristo, dechúh caça cuh yahn nchuhn che vate ne yan vāco ihyan, yahn yahn Ponto man, Galacia man, Capadocia man, Asia man, Bitinia man. ²Man Dendiohs Chida tendahnun ye nchuhn, chihco vih Vaco Ndah yahn ye nchuhn, cava che nevahnecon ne Dihvo vo Jesucristo, ndevahn ne yahn che chera yun yahn ye cava ne.

Ricá Dendiohs che ama din yahino ye nchuhn, din ye che ama ndahca cuahtenan ne.

³Ndeva vo yavenan Dendiohs, Chida Dihvo vo Jesucristo, te ama din yahino ye uvo, ne din ye che ndo vo anduhneca ihyan ra, ntihton cuāco ye vederendedecadino yuhn vo. Cuañ che ndedetuhche ye Dihvo vo Jesucristo van tenahn ne, ndahcorun ye nducuahn cava che ndah yuhn vo. Man ne, ndichahtino vo che ndeva ye uvo, ne metah nde ama nan dehtenduh che co din che hua conahn. ⁴A va cade che cuahtenan vo vahchetero numacuahn ro, ne chemin ne, anduhneca ama vedecuihca che hua nda ro che cuihno. A man Dendiohs din ye che conahn. ⁵Nchuhn ne, ritahno ne Dendiohs, ne numacuahn vederihquentiyon yahn ye redin ye cudado nchuhn cava che ndeva ye nchuhn nda ro che cuihno iyehnse.

⁶Chemin che vate nchuhn vedeyeno andahre ama ndeh nan dehtenduh che rahno ri ne man ro cuh. Che rechuhrihn ne ne, neve ro no chemin. ⁷Ate va che chuhrihn ne cava che cuhnde ro che numa cuāco ritahno ne Dendiohs. Ndete che numa cuāco ritahno ne ihyan ne, ndeva ye nchuhn, quendah yavenan ne ro che nda Dihvo vo Jesucristo. Diyahnguan ne,

hua rengu cuahn d̄ama, ate retive ihyan yahn, rendedevihne ye, rendihchenan ye ndete che ndah. Me nchuhn che ritahno ne Dendiohs ne, tahque redin yahn che ndihchenan ye ndete che numa cuāco ritahno ne.

⁸Dihvo vo Jesucristo ne, andahre hua rendihchero nchuhn ihyan, ate yahino ne ihyan, ritahno ne ihyan, ne chemin che āma yeno ne. ⁹Nducote ritahno ne ihyan ne, quenan cuma che cuahtenan ne vahchetero numacuahn ro.

¹⁰Ihyan profeta che chahte ye a rahn me ne, cahndudo ye che ndedevahn Dendiohs nchuhn, ne āma ndiquendi ye nduco cudado, nahn cadino ndah ye yahn. ¹¹Vaco Dihvo vo Jesucristo ne, quenun ihyan chahn, din che cahndudo ye yahn dehtenduh che va che chuhrihn Dihvo vo man, yahn vederihquentiyon chahte che ndonda tah ye cuihno min man. Hua chenan chenahn ihyan chahn, ne chemin che ndiquendi ye, nahn cadino ye duh ihyan min man, ticuahn conahn man. ¹²Caḥ Dendiohs, checadino ihyan chahn che ndudo che cahndudo ye ne, ndiyu cava che ndah yahn man ye, te che ndah yuhn vo. Man ne, ihyan che rahndudo ye ndudo ndah yahn Dihvo vo Jesucristo ne, numacuahn vederihquentiyon yahn Vaco Ndah yahn Dendiohs che dechuh ye ne, a cahndudo ye ndudo min che dirun ihyan profeta chahn, chihnevan nchuhn. Yahn ndudo min ne, nde ángel che vate ye vahchetero, nahn tumacadino ye.

Nahn Dendiohs che runecade cuahtechica ihyan yahn ye

¹³Nducote nedin yahn Dendiohs nchuhn ne, nahn che cuahteyan nchuhn man, nahn che runecade cuahtechica ne man, nahn che quendi ne numa ino ne cochahtino ne che ndeva Dendiohs nchuhn ro che nda Dihvo vo Jesucristo man. ¹⁴Codinahn ne yahn Dendiohs, ne hua quendi ne cuahtechica ne nduhca che a chahtechica ne ro menan cuahn che metah cahnevan ne Ndudo yahn ye. ¹⁵Tahque ndah ne, runecade cuahtechica ne, te Dendiohs che nedin yahn ye nchuhn, ndiyu ndere ihyan. Tihca nahn che din ne, ¹⁶te nan Ndudo yahn Dendiohs ndirun tuhca: “Hua ndere cuahtechica nchuhn, cuahtendihco ne nunde, te u ne, ndiyu ihyan nunde u.”

¹⁷Dendiohs ne, numa cuāco retechecade ye tunoca che nedin ihyan. Nducote renevahnevan ne ihyan, rahn ne te Chida ne

ihyan cuahn che revah ne ne, nahn che quendi ne nevahneacun ne ihyan numacuahn ro che cuahtenan ne iyehanse. ¹⁸A devano ne te ro man me ne, quendi ne costumbre che nde hua cochihve, che chihco ihyan ndico yahn ne, ate a ndedevahn Dendiohs nchuhn yahn nducuahn chemin. A ndevahn ne, ndiyu nduco dehtenduh che rihno nduhca diyahnguan o diyahngua, ¹⁹te ndevahn ne nduco yun yahn Dihvo vo Jesucristo, ihyan min che chihco mendahn ye ihyan nduhca ama itecuche lihn che hua dehva niyahn te, chi te vedino cava nunde yahn ihyan. ²⁰Nde ro che metah cuhnde iyehanse ne, a va cade che tihca cuahno co Dihvo vo, ne chinahn nde man ro cuh cava che ndah yahn nchuhn. ²¹A cava Dihvo vo Jesucristo che ritahno nchuhn Dendiohs, ihyan min che ndedetuhche ye Dihvo vo van tenahn, ne ndahco ye vederihquentiyon chahte tah ye. Man ne, a Dendiohs che vedechahtino yahn ne, chenan ino ne che ndeva ye nchuhn.

²²Din Vaco Ndah yahn Dendiohs che nevahneacun nchuhn Ndudo yahn Dendiohs, ndo ne ihyan runecade. Numa cuaco redin yahino vih ne, ne nahn che quendi ne numa ino ne din yahino vih ne. ²³A Dendiohs din ye che ndo ne ihyan ra, anduhneca ndete che quenuma ra chahteyan ne. A nduco Ndudo yahn ye chihco vih ye nchuhn cava che cuahtenan ne vahchetero numacuahn ro, ne Ndudo yahn ye ne, hua nda ro che cuihno. ²⁴Nan Ndudo yahn Dendiohs a ndirun tuhca:

Nducoyaca ihyan iyehanse ne, anduhneca chano, te hua rengu ye,
ne vederihquentiyon yahn ye ne, anduhneca nanda, te rihno.

Chano ne, retih, ne nanda ne, ra;

²⁵ate Ndudo yahn Dihvo vo Dendiohs ne, hua nda ro che cuihno.

Ndudo min ne, a Ndudo Ndah yahn Dihvo vo Jesucristo che cahndudo ihyan, chihnevan nchuhn.

2 ¹Chemin che nahn che hua ndere cuahtechica nchuhn, din ne dehtenduh che chihnga. Hua cahnceh ne man, hua din o nan o chende ne man, hua din ve ne man, hua nte ne ndudo cuahnde man. ²Nduhca decuah yuno che ama nahn cuh leche cava che cuihta ne, tihca codin nun ino nchuhn, cahcovan ne Ndudo yahn Dendiohs, te nahn che conahn ndah

ne man, cochahtino ne man, cava che ndevahn ne. ³Tihca, te a tumacadino ne che Dihvo vo Dendiohs ne, ama quenan cuma ye vedeyahino cava ne.

⁴Cuinevah necun nchuhn Dihvo vo Jesucristo, ihyan min che redin ye che cuahtenan ne vahchetero numacuahn ro. Anduhneca ama tu che chacondah vedame sahn vihcherahto ro menan, ne adiva tumacadino se che tu min che tahque cochihve cava name yahn vah che rihno se ne, tihca ihyan min, te a chihco vih Dendiohs ihyan cava che ndeva ihyan iyehnse yavenan ye. ⁵Nduhca che retendahnun sahn vihcherahto tu che rahto se ama yaco ne, tihca cah yune nchuhn che nedin dama Dendiohs nchuhn cava che conun Vaco Ndah yahn ye nchuhn, ne ndo ne anduhneca chidocuyan ndah, din ne ntiyon yahn ye numacuahn vederihquentiyon yahn Dihvo vo Jesucristo. ⁶Nan Ndudo yahn Dendiohs ne, a ndirun tuhca:

U ne, chihco vih ama ihyan che co ye anduhneca ama tu ndah che tendahnun sahn vihcherahto che co esquina yahn name yahn yaco van ihyan naci6n yahn Israel.

Nducoyaca ihyan che cotahno ye ihyan min ne, quendah yavenan ye.

⁷Nchuhn che ritahno ne ihyan min ne, ama yahino ne ihyan, ate ihyan che hua ritahno ye ihyan ne, conahn nduco ye nduhca che a ndirun nan Ndudo yahn Dendiohs tuhca:

Ihyan min ne, conahn nduco ye nduhca che chinahn nduco tu che chacondah vedame sahn vihcherahto menan, te tu min che tahque chichihve adiva.

⁸Namin ndirun nan Ndudo yahn ye tama cuan tuhca:

Ihyan min ne, co ye nduhca ama tu che renda cah ihyan man, che redin che rendave ye man.

Tihca, te ihyan che hua chitahno ye ndudo ndah yahn Dihvo vo Jesucristo ne, a chinda ye nduhca che a nihnde cade yahn ye.

Ihyan yahn Dendiohs

⁹Nchuhn ne, a ndihco vih Dendiohs nchuhn, a ndo ne anduhneca ihyan naci6n yahn Israel. A ndo ne anduhneca chidocuyan, rendeva ne yavenan Dihvo vo Jesucristo, ihyan min che ndinan ye yahn ne. A tendahnun Dendiohs

nchuhn che co ne ihyan yahn ye çava che cuahndudo ne yahn vederihno rahte che din ye nduco ne. Ro menan me ne, anduhneça ndete che ntude ndutinan ne, ate din ye che chenahn ne ndudo ndah yahn ye. ¹⁰Ro menan me ne, hua ndi cuande ne van ihyan yahn ye, ate man ne, a nedin yahn ye nchuhn. Ro menan me ne, vatemān ne, metah duh che quenān vahino nchuhn, ate man ne, renan vahino ye nchuhn.

¹¹Dihnó che yahinó nchuhn, che vate ne yan vaço ihyan, ricá nchuhn che hua ndere cuahtechica ne, cuahtendihco ne nunde, te chemin redin che rinda ihyan. ¹²Runecade cuahtechica ne van ihyan che hua renevahnecun ye Dendiohs çava che nduco tihça ne, andahre rahn ye yahn nchuhn che duhtuno ihyan ne, ate ndihchero ye che runecade vatechica ne, ne ndeva ye yavenan Dendiohs nda ro che techecade ye yahn nducoyaca ihyan.

¹³Çava che quendāh yavenan Dihvo vo Jesucristo ne, codinahn ne yahn ihyan ndinan che rihquentiyon ye muhn iyehñse, emperador che tahque yudo vederihquentiyon yahn ye man, ¹⁴sahn ndinan che rinan se ihyan man. Sahn chahn ne, redechuh ye çava che din se castigo sahn che chendihco nunde, ne redin se cudado ihyan che ndah ihyan ye. ¹⁵Tihça nahn che din nchuhn, te nahn Dendiohs che runecade cuahtechica ne çava che nduco tihça ne, nde nan che çahma ihyan tundo metah.

¹⁶Man ne, metah rihquentiyon nunde yahn ne nchuhn, te a ndedevahn Dendiohs nchuhn. Chemin che nahn che runecade cuahtechica ne. Hua ndedecadino ne che nducote a ndedevahn Dendiohs nchuhn ne, co ndere cuahtechica ne, cuahtendihco ne nunde. Tahque ndah ne, runecade cuahtechica ne nduhça che rihquentiyon Dendiohs. ¹⁷Cuenevahnecun ne Dendiohs. Cuenevahnecun ne emperador. Cuenevahnecun ne queri ama ihyan. Cuahtenan cuma ne vedeyahino van man ne nduco vih che ritahno ne Dihvo vo Jesucristo.

***Nduhcq che va che chuhrihn ihyan che
ritahno ye Dihvo vo Jesucristo***

¹⁸Nchuhn che redin ne ntiyon yahn ihyan ne, numacuahn vedeneñcun codinahn ne yahn ihyan che redin nduco ne ntiyon, a ndah ihyan ye, o duhtuno ihyan ye. ¹⁹Andahre

rechuhrihn ne, ndere redin t̄an ihyan nduco ne, ate ndete redin chahtino ne yahn che renevahnecun ne Dendiohs ne, quendaḥ yavenān ne. ²⁰Tihc̄a, te ndete che quendaḥ ne vedechahtino cuahn che co nchuhn castigo yahn che chendihco ne nunde ne, nde hua cochihve yahn ne. Ate ndete che quendaḥ ne vedechahtino cuahn che ndere redin ihyan castigo nchuhn yahn dehtenduh che ndah che redin ne ne, tuhme che cuāco quendaḥ yavenān ne n̄an Dendiohs. ²¹Tihc̄a va che din chahtino nchuhn, te a c̄ava chemin che tendahnun Dendiohs nchuhn. Dihvo vo Jesucristo ne, chuhrihn ye c̄ava nchuhn, ne tihyon yune ye nchuhn che quendi ne yune yahn ye. ²²Ihyan min ne, hua ndere quechica ye, quendihco ye nunde, nde hua chihncheh ye nde āma ihyan. ²³Cuahn che r̄ahva ihyan nduco ye ne, hua ndahconan ye ndudo t̄an. Cuahn che redin t̄an ihyan nduco ye ne, quendaḥ ye vedechahtino, ne ndāhco ye nducuahn che redin ye t̄ah Dendiohs, ihyan min che retechecade ye numa cuāco. ²⁴A m̄an Dihvo vo Jesucristo chuhrihn ye, quenan yāh ye n̄an cruz, nedihve ye nunde yuhn vo, c̄ava che c̄ahcoman vo nunde yuhn vo, ne runecade cuahtechico vo. Chih ye c̄ava che ndedevahn ye uvo, ²⁵te ro menān me ne, vatechica v̄ane vo anduhneca itecuche che chinda te, ate m̄an ne, nevahnecun vo Dihvo vo Jesucristo, ihyan min che redin ye cudādo uvo nduhc̄a ihyan che redin ye cudādo itecuche yahn ye.

Nduhc̄a che va che cuahtenan ihyan che nihnevāco ye nduco vih

3 ¹⁻²Nchuhn ihyan ndāhta che nihnevāco ne ne, cuenevahnecun ne inchāhn ne. Nduco tihc̄a ne, andahre hua rihcovan inchāhn ne ndudo ndah yahn Dihvo vo Jesucristo, ate tumacadino ye che runecade ne m̄an, necun ne m̄an, ne nevahnecun ye ndudo min, nde hua ndotenan che yāhve ne ihyan. ³Ndiyu demān che āma ndedecuco ne tin ne m̄an, ndedecuco ne nchuhn nduco diyāhnguan m̄an, cuahtenun ne tino che āma ndahchan m̄an. ⁴Che tahque nahn ne, che cuahtenan cuma ne vedenecon, te chemin che āma richihve n̄an Dendiohs. ⁵Ihyan ndāhta che chahte ye a r̄ahn me, che ndah ihyan ye m̄an, che chichahtino ye Dendiohs m̄an ne, tihc̄a chahtenan cuma ye vedenecon, ne dinahn ye yahn inchāhn ye. ⁶Nduhc̄a Sara che nevahnecun ye inchāhn

ye Abraham, ne rahn ye che dihve ye ihyan. Me nchuhn ne, quendi ne yune yahn ye ndete che runecade ne man, cohahtino ne Dendiohs, ndahco ne nducuahn tah ye man.

⁷Namin nchuhn ihyan chahn che nihnevaco ne ne, cuahtenan cuma ne ihyan ndahta yahn ne nduco vedino vedenecun, te a devano ne te hua dama fuerza yahn ye nduco ne. Tihca va che din ne, te namin ndeva Dendiohs ihyan chahn dama nduco ne. Ndete che hua dinahn ne tihca ne, nde hua nguahco yahn che revah ne.

Ihyan che ritahno ye Dihvo vo Jesucristo ne, ndere redin tan ihyan nduco ye yahn che redin ye dehtenduh che ndah

⁸Man ne, rahn ri nducoyaca nchuhn che ama no vederendedecadino cuahtenan cuma ne nduco vih. Cuenevahnecon ne vih numacuahn vedino vedenecun. Codin yahino ama tama ne vih. ⁹Hua dama co ne nduco ihyan che redin tan ye nduco ne. Hua dama co ne nduco ihyan che retahn nan ye nchuhn. Tahque ndah ne, codin ne che ndah nduco ye, te cuahn che tendahnun Dendiohs nchuhn ne, nte ye ndudo yahn ye che din ye che ndah nduco ne. ¹⁰Tihca, te nan Ndudo yahn Dendiohs ne, a ndirun tuhca:

Ihyan che nahn ye che ndahca cuahtenan ye iyehense ne, nahn che hua ndere cahma ye ndudo tan man, ndudo cuahnde man.

¹¹Nahn che cahcoman ye nducuahn che chihnga, ne din ye che ndah man, nahn che ndahca cuahtenan ye nduco ihyan chenahn, hua cuahte canda ye man.

¹²Tihca, te Dihvo vo Dendiohs ne, nda cuande ye ihyan che ndah ihyan ye, ne rihcovan ye che revah ye.

Ate ihyan che duhtuno ihyan ye ne, redin ye castigo ihyan.

¹³Ndete che din nchuhn che ndah ne, nde ama ihyan hua ndahco ndiya ye nchuhn. ¹⁴Andahre din tan ihyan nduco ne yahn che redin ne che ndah, ate ndah ro yahn ne. Hua cua ne cudado, hua din vah ne nde ama ihyan. ¹⁵Cuendeva ne yavenan Dihvo vo Jesucristo numacuahn chedave yahn ne, codinahn ne yahn ye. Cuahteyan nchuhn cava che numacuahn vedino vedenecun cah cuande ne adecoduhno ihyan che tumerune ye nchuhn yahn che chenano ne che ndeva

Dendiohs nchuhn. ¹⁶Hua cuahtenun ino nchuhn vedetan nduco nde ama ihyan, çava che ihyan che chihnga rahn ye yahn nchuhn ne, tumacadino ye che runecade vatechica ne, ritahno ne Dihvo vo Jesucristo, ne co cuihnan ye che tihça rahn ye. ¹⁷Tahque ndah che chuhrihn vo, din tan ihyan nduco vo yahn che din vo dehtenduh che ndah ndete che tihça nahn Dendiohs, che co che chuhrihn vo, din tan ihyan nduco vo yahn che din vo dehtenduh che hua ndah.

¹⁸Tihça, te nde man Dihvo vo Jesucristo chih ye, nedihve ye ama yune no nducuahn nunde yuhn vo. Ihyan min ne, metah nde ama nunde yahn ye, ate chih ye çava che, uvo che chendihco vo nunde ne, ndo yan Dendiohs nduco vo, ne nedin yahn ye uvo. Ihyan iyehnse ne, chihno ye ihyan, ate ndeva Dendiohs ihyan. ¹⁹Numanahn che metah ntuche ye ne, chahn ye cahndudo ye ndudo yahn ye, chihnevan vaco tenahn che chenah rino ye che co ye castigo. ²⁰Ihyan chahn che chahcotahn ye yahn Dendiohs a rahn me, ro che quenah Noé iyehnse. Ro min numanahn che chindah arca me ne, numacuahn vedechahtino quenah rino Dendiohs che nto ino ye nunde yahn ye. Ate hua nto ino ye, ne atenan nine ihyan che ndevahn ye van nune. ²¹Nune min ne, ama ejemplo yahn che rededenune ihyan man ro cuh. Nduhça che ndevahn neve ihyan chahn nan nune ne, tihça ndevahn ihyan che rededenune ye man ro cuh. Ihyan ne, redenune ye, ndiyu çava che ndere ndo dave ye, te redenunde ye yahn che a ndaça ye vederenchahco, ne nduco tihça rah ye Dendiohs, richahtino ye ihyan. Ihyan che redenune ye ne, ndevahn ye yahn che ntuche Dihvo vo Jesucristo, ²²ihyan min che conda ye vahchetero, ne va ye lado tah cuaco Dendiohs, rihquentiyon ye ángel man, nducuahn vederihquentiyon che va iyehnse man.

Nahn che din yahino ama tama vo vih

4 ¹Nducote chuhrihn Dihvo vo Jesucristo, quenah yah ye nan cruz ne, codin nchuhn cuande anduhneca ndete che a man nchuhn chih ne, çava che nduco tihça ne, metah che quendi ne cuahtendihco ne nunde. ²Tahque ndah ne, numacuahn ro che cuahtenan ca ne iyehnse ne, cuahtechica ne nduhça che nahn Dendiohs, ndiyu nduhça che nahn man ne. ³A co ngua nchuhn nduhça che chahtechica ne ro menan

me. Dama chi ne nduco ihyan che hua ritahno ye Dendiohs, chahtechica ne vedeyeno yahn man ne, chahtendihco ne nunde. Chicoh ne man, chahte ne vihco vedecoh man, chihnga din ne, ndeva ne yavenan dehtenduh che ndere redin ihyan dendiohs yahn ye man. ⁴Ihyan chahn ne, ri yudo yahn ye che ametah dama ri ne nduco ye, ndere cuahtechica ne, ne chemin che chihnga rahn ye yahn ne. ⁵Ate va che cuhnde cade yahn ye nan Dihvo vo Jesucristo, ihyan min che a va yan ye che techecade ye yahn nducoyaca ihyan, ihyan che chenduche ye man, tenahn man. ⁶Chemin che tenahn chahn ne, namin cahndudo ihyan ndudo ndah yahn Dihvo vo Jesucristo, chihnevan ye, cava che andahre va che cuhnde cade yahn ye nduhca nducoyaca ihyan chenahn, a metah va che conda ye, te co ndeva Dendiohs ihyan, cuahtenan ye vahchetero numacuahn ro.

⁷A cochi nino ro che nto iyehense. Chemin che nahn che runecade cuahtechica nchuhn man, covah ne man. ⁸Che tahque nahn ne, che cuahtenan cuma ne vedeyahino nduco vih, te ndete che tihca din ne ne, andahre ama ndeh yune cuahtendihco ne nunde nan vih ne, co nchahco ama tama ne yahn vih. ⁹Numacuahn chedave yahn ne cuenevahnecon ama tama ne vih ndevaco ne. ¹⁰Ama ndeh nan vederihquentiyon nte Dendiohs nchuhn, ne nahn che runecade conan cuma queri ama nchuhn vederihquentiyon che nte ye nchuhn, codin ne che cochihve cava che ndah yahn ihyan chenahn. ¹¹Nchuhn che chenah cuma ne vederihquentiyon che cuahndudo ne Ndudo yahn Dendiohs ne, cuahndudo ne Ndudo yahn ye nduhca che redin yahn. Nchuhn che chenah cuma ne vederihquentiyon che conan ne ihyan chenahn ne, cuinan ne ihyan numacuahn vederihquentiyon yahn Dendiohs. Nan nducuahn ntiyon che redin ne yahn che ritahno ne Dihvo vo Jesucristo ne, codin nun ino ne che quendah yavenan Dendiohs. Dihvo vo ne, quenah cuma ye vederihquentiyon chahte numacuahn ro, ne redin yahn che ndeva vo yavenan ye cuahn dama. Tihca co.

Nahn che cuahtenan cumo vo vedechahtino

¹²Dihno che yahino nchuhn, hua cahh ino ne yahn che ama rechuhrihn ne, rendihchenah Dendiohs nchuhn, ndedecadino

ne deh cuande che tihcā rahno ne. ¹³Tahque ndah ne, cuenecah yan ne chedave yahn ne cuahn che rechuhrihn ne nduhcā che chuhrihn Dihvo vo Jesucristo, te ndete che tihcā din ne ne, namin co yeno ne cuahn che ndaconan ye numacuahn vederihquentiyon chahte yahn ye. ¹⁴Ndete che din tan ihyan nduco ne yahn che ritahno ne Dihvo vo ne, ama ndah ro yahn ne, te a ndero ndi che quenun Vaco Dendiohs nchuhn numacuahn vederihquentiyon yahn. ¹⁵⁻¹⁶Ndete che chuhrihn ne, din tan ihyan nduco ne yahn che ritahno ne Dihvo vo ne, hua co cuihnān ne. Tahque ndah ne, cuiquendi ne cochahtino ne ihyan cava che quendāh yavenān Dendiohs. Ate hua cahno ne ihyan mān, hua duco ne mān, hua cuahtendihco ne tama nān nunde mān, hua condā mendāhn ne nān dehtenduh che redin ihyan mān, te hua ndāhcā che tihcā din ne, co ne castigo, chuhrihn ne.

¹⁷A cochi nino ro che cuhnde cāde yahn nducoyāca ihyan iyehñse. Nducote cuanān nduco uvo ihyan yahn Dendiohs ne, nde tahque chuhrihn ihyan che hua rihcovan ye ndudo ndah yahn ye. ¹⁸Tihcā, nduhcā che a ndirun nān Ndudo yahn Dendiohs tuhcā:

Nducote ihyan che ndah ihyan ye a conunde co ndevahn ye ne,

ihyan che duhtuno ihyan ye ne, a va che conda ye.

¹⁹Chemin che ndete che rechuhrihn ne, redin tan ihyan nduco ne yahn che runecāde vatechica ne nduhcā che nahn Dendiohs ne, cuiquendi ne runecāde cuahtechica ne, condāhco ne nducuahn tāh Dendiohs, ihyan min che dendah ye iyehñse mān, redinahn ye ndudo yahn ye mān.

*Ihyan ndinan yahn yāco ne, va che din ye
cudādo ihyan yahn Dendiohs*

5 ¹Nchuhn, ihyan ndinan che nda cuande ne ihyan ndiyāco, riyāhvé nchuhn, te namin u ne, quenān cumā vederihquentiyon min, ne ndihchero mān che quenān yāh Dihvo vo Jesucristo mān, che ndondā tāh ye vederihquentiyon chahte nduhcā che conan cuma ye ro che ndaconan chi tun ye mān. ²Nduhcā ihyan che redin ye cudādo itecuche yahn ye ne, tihcā codin nchuhn cudādo ihyan yahn Dendiohs che nda cuande ne. Codin ne ntiyon min numacuahn vedeyeno,

ndiyu nduco fuerza, nde huane cava tume. ³Hua condinun condinahn ne ihyan chahn che nda cuande ne. Tahque ndah ne, runecade cuahtechica ne, cotihyon yune ne ihyan cava che tihca quendi ye. ⁴Nduco tihca ne, cuahn che nda Dihvo vo Jesucristo, ihyan min che ndinan ye yahn ihyan yahn Dendiohs, redin ye cudado ihyan ne, ndeva ye nchuhn, quendah yavenan ne, cuahtenan ne nduco ye numacuahn ro.

⁵Namin nchuhn sahn decahya, cuenevah necun ne ihyan ndinan che nda cuande ye ihyan ndiyaco. Nducoyaca nchuhn che ritahno ne Dihvo vo Jesucristo, numacuahn vedino vedene necun codinahn ama tama ne yahn vih, te a ndirun nan Ndudo yahn Dendiohs tuhca:

Dendiohs ne, rendahco ndiya ye ihyan che yade ye,

ate numacuahn vedeyahino rinan ye ihyan che necun ye.

⁶Chemin che condahco ndiya man ne nchuhn nan Dendiohs, ihyan min che ama yudo vederihquentiyon quenan cuma ye, cava che ndeva ye nchuhn nda ro che cuhnde cade yahn ihyan iyehense. ⁷Hua cua nchuhn cudado. Tahque ndah ne condahco ne nducuahn tah Dendiohs, te ihyan min ne, redin ye cudado nchuhn.

⁸Cuahteyan nchuhn, te chundah, sahn min che hua ri rendihche se nchuhn ne, quechica se numachahte, rinuhn se ihyan che co din se che conda ye. Sahn min ne, nde tahque duhtuno se che co ama yahyan tan che rinuhn te ihyan che cheh te. ⁹Cuiquendi ne numa ino ne cohahtino ne Dihvo vo Jesucristo, ne hua tumacah ne yahn se, te a devano ne te numa chahte iyehense recah rihn se ihyan yahn Dendiohs. ¹⁰Cuihno che a nchuhrihn nchuhn neve ro ne, Dendiohs, ihyan min che quenan cuma ye vedeyahino chahte, ne a tendahnun ye nchuhn cava che cotahno ne Dihvo vo Jesucristo, cuahtenan ne vahchetero numacuahn ro ne, man ye cah dito ye nchuhn, din ye che quendah ndah ne, quendi ne numa ino ne yune yahn ye. ¹¹Ihyan min ne, quenan cuma ye vederihquentiyon chahte numacuahn ro, ne redin yahn che ndeva vo yavenan ye cuahn dama. Tihca co.

¹²Dirun neve ndudo yahn nchuhn, dechuh caca cuh nduco dihno vo Silvano, sahn min che quenan ino che co cohahtino nchuhn che cahma se. Che dirun yahn ne ne, riyahve nchuhn numa cuaco yahn vedeyahino che quenan cuma Dendiohs nduco ne. Cohahtino ne ihyan min.

¹³Ihyan ndiyaco che vate ye yan che rahn ihyan Babilonia yahn, che tendahnun Dendiohs ihyan nduhca nchuhn ne, dechuh ye Dendiohs yahn ne. Marcos, sahn min che nduhca dayá rihno sahn, namin dechuh se Dendiohs yahn ne. ¹⁴Numacuahn vedeyahino cuenecah ama tama nchuhn Dendiohs vih che cuande yahn.

Ricá Dendiohs che din ye che ndahca cuahtenan nducoyaca nchuhn che ritahno ne Dihvo vo Jesucristo. Tihca co.